

欽定剿平粵匪方略

欽定勦平粵匪方略卷二百二十一 己未年

七月初二日

庚午

曾國藩奏言 臣於五月

派知府曾國荃帶領五千餘人前往景德鎮會

同張運蘭等移營雞腳嶺一帶層層進逼二十

六日營壘未成賊出三股過河來撲各營梟水

抄擊殺賊百餘人時浮梁援賊大至計二萬餘

人各營分三路截擊陣斬黃衣騎賊及先鋒賊

十餘名賊始奔潰二十八日賊復過河直撲老
湘營我軍迎擊殺賊百餘名六月初二日賊仍
傾巢來撲以馬隊三四百人排列對河而以一
股犯老湘營一股犯岳字營張運蘭帶隊將賊
擊退直衝過河與岳字營進偪里村逆巢賊從
旁路包抄我軍陣亡五十三人都司李印典守
備向其昌陳玉才死之經朱品隆等各營接應

賊始大敗自是三戰皆勝圍偏愈緊賊糧垂盡
知其不能久踞矣適天雨江漲劉于涇水師與
彭玉麟派來之水師遊擊任星元等緊偏西瓜
洲晝夜環攻楚軍陸師亦將賊卡焚燒斷賊接
濟十三日夜賊出火簫四十餘架夾岸輔以陸
賊焚攻水師我軍排礮對擊楚軍亦出隊進剿
兩岸之賊擊斃多名十四日夜水師各營施放

噴筒火箭延燒鎮市民房該逆乘黑暗潛竄浮
梁曾國荃與張運蘭等督兵分路進攻一面焚
燒各卡斬馘追奔十五日抵浮梁縣該城有一
河之隔賊搭浮橋上下三道礮船十餘號其殿
後之賊尙有數千未過浮橋我軍窮追賊扼橋
抗拒傷我弁勇十餘人千總高成春死之相持
良久城內忽出悍賊三四千人衝過浮橋曾國

荃張運蘭等分督官兵奮擊立斃悍賊二百餘
名該逆自相踐踏落水死者近千人當卽跟蹤
入城張運蘭從西門外抄入王文瑞從東門外
抄入所有斷後悍賊殄殲殆盡當將縣城克復
敗賊奔竄祁門建德一帶我軍追過縣城四十
餘里戍刻收隊是日追逐七十餘里斃賊二千
餘名生擒二百七名查景德鎮爲江西皖浙三

省要衝去臘派張運蘭帶領楚軍會勦前後數十戰互有勝負今幸派兵助勦力戰成功江西全省肅清除曾國荃係臣親弟不敢仰邀議敘及江軍出力人員應由撫臣奏獎外其尤爲出力之按察使銜卽選道張運蘭等先行開列懇

恩給予獎勵其餘楚軍出力員弁可否由臣擇尤保獎陣亡之都司李印典守備向其昌陳玉才守備

銜千總高成春請各照本職從優議卹

曾國藩又奏言 臣前奉防蜀

諭旨業將景德鎮喫緊難遽撤退據實覆奏今幸景德鎮克復情形又自不同竊思防蜀之行原係防湖南之賊也儻能於湖南協力痛殲豈不事半功倍現在大股賊圍寶慶湖北已派李續宜帶兵赴援 臣擬檄調張運蘭等一軍四千人先行

馳赴寶慶併力會剿在楚多殺一賊卽入蜀少
去一賊乘景鎮得勝之勢用弁勇追救桑梓之
情或可得力臣部署定後卽由湖口武昌而上
或先扼駐宜昌等郡使湘賊不敢渡江窺伺荆
宜以保湖北之西路如賊果入川再行酌調蕭
啟江張運蘭兩軍督同赴蜀防剿奏入

奉命軍機大臣傳諭會國藩曰該侍郎檄調張運蘭等

一軍四千人先赴寶慶會勦如能在湖南界內將該
逆協力痛殲使其不至西竄自與該侍郎入川無異
所恐賊勢散漫路徑紛歧未能攔截曾國藩雖先駐
宜昌等處仍當偵探賊情如寶慶一帶未能遏其入
川之路卽當親督兵勇赴蜀以便調度堵勦機宜未
可遷延貽誤著曾國藩仍遵前旨俟到楚後與官文
等妥商進紮地方並酌撥兵勇以備帶往設或賊犯

四川則蕭啟江張運蘭兩軍皆可調赴防剿該侍郎隨時酌辦可也

諭內閣曰官軍攻克景德鎮及浮梁縣城江西全省一律肅清勦辦甚爲得手曾國藩調度有方著交部從優議敘在事出力之知府曾國荃著免選知府以道員用卽選道張運蘭著賞加布政使銜王文瑞著賞給揚勇巴圖魯名號遊擊任星元著賞給勵勇巴

圖魯名號已革編修吳嘉賓著以內閣中書不論雙
單月遇缺卽選並賞加五品銜其餘楚軍出力各員
弁著曾國藩擇尤請獎其江西各軍出力人員著耆
齡查明請獎陣亡之都司李印典守備向其昌陳玉
才千總高成春著各照本職從優議卹

初三日 辛未 勝保奏言粵逆陳四眼狗於上月糾

同逆首僞主將李受懲韋志俊悉銳撲犯盱眙

經臣督兵擊敗南竄該逆遂分股勾結捻首龔瞎子廬逆吳如哮會攻定遠自率各僞主將帶領死黨數萬分撲來安滁州其攻犯來安者偏城紮營自初三至初六無日不至濠外猛撲經守城之李元忠等督飭勇丁憑城施放槍礮連環轟擊每次斃匪甚衆初七日李元忠等各選帶精壯數百人潛出南北兩門分路設伏守備

董正品暨李元忠先後搶入賊營兩路斃匪五六百名生擒百餘名十一至二十等日該匪愈聚愈多刻下來城之圍仍尙未解環滁數十里之間該逆連營屯踞阻塞要路滁城同時被圍幸李世忠先期於初五日由來安趕赴滁城嚴率弁勇以守爲戰未致爲賊所乘十二日都司朱元興等將城西賊營踏毀二座十四日李世

忠親督勇隊踏毀西北賊營三座十五日夜李世忠復帶馬隊官兵由滁東疾行三十五里潛抵水口痛剿運糧之賊殺斃五百餘名生擒一百二十八名陳四眼狗心懷忿怒連夜突至滁城糾合大股一二萬人於十七日齊抵城下立將四門合圍李世忠選派馬步精銳弁勇出城分三路兜抄一擁而前逆勢敗潰我軍追殺十

餘里斃匪七八百名生擒二百三十一名就地
正法近城西北之賊亦連夜遁去查滁來兩城
輔車相依且與定城犄角今定遠旣已有失附
近之水口朱龍橋等處匪蹤徧地浦六全和相
距咫尺設此二城再有疏失則皖北情形不可
收拾此時惟有迅解來城之圍嚴固滁州之防
爲急切要務臣已密飭李世忠及各該地方官

協同堵剿以期戰守兼資奏入

上諭內閣曰粵逆大股北竄皖境撲犯盱眙分攻定遠
陳逆自率死黨分撲來安滁州經李元忠李世忠等
選帶精壯分路兜抄逆勢大潰斃匪甚多著勝保卽
飭李世忠及該地方官認真剿堵迅解來安之圍以
靖地方毋留餘孽

初四日 壬申 張芾奏言自總兵普承堯各軍挫退

建德賊衆專注東路副將王夢麟節次奮擊賊
仍輕我兵寡肆竄太湖潘村下西嶺洞門口等
處以圖大逞王夢麟力持數十日不敢引軍輒
退旣望普承堯收合潰卒整旅前來又冀景德
鎮旦夕攻復會師夾擊庶不至盡棄前功初四
日都司江長泰等分路擊賊王夢麟復親督兵
勇分隊縱擊連斃黃衣賊酋頗多俘獲自此軍

心稍振不謂外援不至而浮梁景德鎮經湖南
江西官軍克復敗匪傾巢東竄突至祁門縣西
鄉延及箬坑禾沙坑日一帶建德之軍旣隔於
外祁門之兵復絀於內總兵江長貴駐守祁門
先調遊擊周光順一軍復檄副將王恩榮自婺
源赴援已慮鞭長莫及而石埭一路賊每乘閒
窺伺尤爲岌岌正在馳書景德鎮軍營乞師籌

勦聞准道員劉于濱編修李鴻章函稱逆酋七
國宗與老賊死黨盡向祁門建德分竄將來實
江皖之患並有侍郎曾國藩擬督軍回援楚湘
之語臣竊計楚中寶慶圍急自應分軍援勦惟
甯國以徽州爲屑齒徽甯又以江西爲屑齒而
實爲蘇浙屏蔽臣愚以爲景德鎮新復就近撥
軍來會則勢旣順而蕺事亦易況曾國藩威望

素爲賊所畏憚若以曾國藩留守江西東圖皖
賊西控楚賊使江浙地方培養元氣以徐裕餉
源不數年卽有起色若因江西全境肅清盡撤
諸軍赴楚萬一逆情譎悍伺隙而東則兵無可
制餉無可籌非徽州一隅之憂也可否請

旨飭下曾國藩暫留江西迅飭各軍越境會剿仍留兵
嚴防景德鎮或酌分數軍馳援楚中庶東南軍

務均有裨益奏入

上命軍機大臣傳諭曾國藩耆齡曰浮梁景德鎮敗匪
傾巢東竄突至祁門邊界延及箬坑禾沙坑口一帶
亟應由江西就近撥兵援應曾國藩能否暫留兵勇
前赴徽州越境會剿或以兵力已單須親自帶往湖
北則江西一省必尙有可用之兵耆齡卽行抽撥
勁旅赴祁門一帶協剿該侍郎與該撫會同商辦以

免蔓延

初十日

戊寅

勝保奏言蔣壩爲皖省東北邊境實

清淮緊要門戶清河雖有防兵甚覺單薄緩急

殊難足恃臣前聞定遠之警馳赴明光迎遏賊

鋒蔣壩遂至一日數警商民紛紛遷徙逮臣趕

緊折回布置人心始定現在和春派有安勇一

軍益以臣所留都司陳德雄一軍兵力自屬稍

厚但臣卽日統師西勦相距日遠遇有緊急一時策應不及斷難放心伏思署漕臣袁甲三久歷戎行老成持重淮城距此僅百餘里朝發夕至應請

旨將蔣壩一帶防勦事宜責成袁甲三就近督率籌辦有事則相機擇要進紮以備不虞奏入

上命軍機大臣傳諭袁甲三庚辰日蔣壩爲清淮門戶

與皖省東北境地相連該處僅有和春派往之安勇
一軍及勝保所留都司陳德雄一軍恐兵力未厚難
資堵禦袁甲三久歷戎行所有蔣壩防勦事宜著就
近督率籌辦應否擇要進紮並著酌度辦理其清淮
一帶水陸紛歧雖盱眙已克天長尙爲賊踞如袁甲
三進紮前路著庚長妥籌後路勿令賊氛旁竄

十二日

庚辰

和春奏言

臣

與張國樑許乃釗籌商

現在情形惟有先盡力於金陵一城絕其根株
則枝葉自萎獨是欲破金陵必須先斷浦口欲
斷浦口必須添募精銳一萬人由張國樑統帶
不分晝夜一面力攻一面進紮營壘斷賊糧路
兼卻外援庶幾攻拔較易惟是用兵之權操之
軍營而籌餉之事則在督臣必餉項有出然後
可以集事查鎮江至常州路僅兩站一水可通

臣於履勘鎮城後卽馳赴常州與督臣何桂清面商意見相同藩司王有齡聞臣赴常州由蘇趕到隨同熟商於無可設法之中竭力籌畫按月撥出銀十萬兩以期料量一切臣等當相度事機剋期蕙功現在江浦圩埂半被水淹須俟白露秋分節後路皆涸出其時應募之人應製之物亦可辦成卽當督飭各軍力圖掃蕩

和春又奏言臣上月檄調總兵張玉良由揚城圍攻六合六月二十二日諜報六合西門外賊之買賣街售賣洋槍食物葛塘集一帶賊來如蟻張玉良傳令各營排六成隊伍四路進攻直擣西門買賣街察看賊勢西北尤爲聯絡因派都司李有才等帶兵扼西北城隅又飭營總常壽都司景星高等帶馬隊三百人由白龍廟截

葛塘援賊四更時出隊銜枚疾驅時各門皆有賊壘賊卡劉成元等行近北門施放火槍焚死守卡老賊多名餘賊猶冒煙抗拒我軍往還奮擊殲黃衣賊目一名破其壘卡劉成元督隊拔去梅花椿搶進濠溝正擬乘勝登城忽西門賊股來援英貴斂軍禦敵都司全升高燃放礮援賊應聲倒地餘黨大潰維時西門官軍設伏

Only at the National Book Store

奔蕪湖之賊竄抵魯港嚴划六七十隻四出擄掠六月初五日探得峨橋石碓之賊約數百名在三山螃蟹磯擄糧密派同知林士志等帶隊伏磯旁村落之中令外委羅浩華帶勇由三山壓下將賊驅入伏中我軍立殪騎馬賊目二名獲其馬匹短兵相接生擒僞副將軍夏海一名長髮賊王青富等七名訊明正法溺斃殺斃者

聞
無數現在賊由建德池州等處窺犯徽甯實爲
金陵西南及江浙肘腋之患臣與張國樑許乃
釗會商密飭灣沚黃池一帶軍營加意防範仍
設法進取六合迅拔浦口務截金陵咽喉於克
復省垣庶有把握奏入均報

同日張芾奏言據署皖南鎮總兵江長貴咨報

賊衆由橫頭村分股一犯插坑圖併建德一犯
歷口圖擾祁門江長貴令副將余永椿等帶隊
分道馳擊鏖戰逾時頗多斬馘余永椿等揮軍
追襲直至彭瓏地方詎該逆全股屬至約二萬
餘人余永椿率所部陳南方等繞過箬坑潛伏
僻徑楊名聲等帶領馬步各隊直擣彭瓏中路
陣斬黃衣賊目各軍士鼓勇而前斃賊無算賊

隊大亂楊名聲令將弁乘勝急躡賊蹤行不數里破葉村賊卡轉戰而前余永椿伏兵正發與賊戰於禾沙坑口陳南方等手刃數賊該匪卽竄向馬口汪村一帶余永椿等復密遣死士挾火具晝夜越山先伏賊壘之後而以大軍直逼汪村羣賊正在憑壘抗拒忽卡後火發延及哨樓賊大驚潰奪橋涉水而渡兵團合力縱擊死

者枕藉餘匪遂於六月二十三日悉數遁出赤
嶺計陣擒老賊二十九人殲殪殆以千計臣聞
賊出赤嶺卽慮旁竄石埭之七都以圖滋蔓令
江長貴等調集兵勇扼要設防二十四日賊果
撲入七都分撲我軍營壘副將吳偉奇山甲子
嶺督隊馳援接仗獲勝不料逆衆大至將各營
圍裹數重以另股堵截甲子嶺後路七都營中

固守兩日糧運水道俱絕外援卒不得入竟致
先後被陷臣以賊進甲子嶺都司劉朝林已由
六都退至石埭而貴池青陽之賊又乘機蠢動
參將張應超扼守崇覺寺未可遽離當令遊擊
田宗興等暫紮黃土嶺迅催總兵米興朝剋日
到防一面飛咨提督周天受撥兵從太平來援
檄令江長貴回駐漁亭抽調婺源防軍從黟縣

進勦副將王夢麟等以千數百人孤懸嶺外方
賊在祁境時建德羣孽傾巢圍攻至七晝夜之
久幸鉛藥軍糧未罄乃能以寡勝衆勉力相持
至總兵普承堯兩月以來未出彭澤一步儻該
逆再圖大逞王夢麟等縱稱健將軍火有時而
盡難保百無一失應請

飭下景德鎮帶兵大員移師建德合勦俾清鄰境以固

內防卽徵營防兵亦當多分數隊以顧石埭一路其裨益實非淺鮮奏入

上命軍機大臣傳諭曾國藩耆齡曰現在祁門之匪經副將余永椿等並該處兵團疊次擊敗後復竄入石埭之七都勢甚猖獗各營被圍數重先後被陷貴池青陽之賊乘機蠢動建德城賊又傾巢撲出情形極爲緊迫亟應由江西就近撥兵援剿曾國藩如可酌

撥兵勇暫留江西著卽飭令移紮建德會同該處官兵合力勦賊其普承堯一軍兩月來株守彭澤並未出境援應著耆齡飭令該總兵迅卽帶兵前往夾擊現在江西境內賊匪業已肅清不得以防守彭澤爲詞致令鄰境賊蹤蔓延

十四日
壬午耆齡奏言景德鎮逆匪占踞險要并

死相持水陸官軍大小百餘戰始得埽蕩巢穴

悉數驅除俾江西境內一律肅清洵足奠民生而彰

天討花翎布政使銜甘肅安肅道劉于瀛前因攻鎮失利經臣奏叅摘去頂戴翎枝該員深知愧奮督率水陸各營親冒鋒鏑力克重鎮厥功最偉懇請

賞還頂翎應再如何給獎之處恭候

欽定其餘出力人員容俟查明另行請獎奏入

上諭內閣曰據耆齡奏甘肅安肅道劉于瀉督率各軍親冒鋒鏑尤爲出力等語劉于瀉著賞還頂翎並交部從優議敘以示獎勵其餘出力人員並著查明保奏

欽定勦平粵匪方略卷二百二十二 己未年

七月十五日

癸未

兼署四川總督成都將軍有鳳

奏言湖南辰州各路可達西秀船小水溜欲赴

上游不易陸路則崇山峻嶺險阻難行由常德

走黔江彭水而趨重慶亦係山徑崎嶇逆匪每

由僻路冒險越竄故西秀黔彭尤爲緊要而涪

州實爲各路總口阜陞等現均駐紮涪州如賊

由辰常竄蜀卽由阜陞等督兵出境迎頭堵剿
夙聞湖南在籍候補道劉長佑知府江忠義副
將田興恕皆爲賊所畏懼應請

飭下官文璐秉章檄令劉長佑等俟賊西竄卽率兵追
躡川省兵勇迎擊中有數站山路甚險人煙稀
少賊匪艱於覓食必將受困卽不難聚而殲旃
奏八

上命軍機大臣傳諭駱秉章曰楚南賊匪現在麕聚寶慶曾國藩先後派往之蕭啟江張運蘭等軍陸續可到卽可與劉長佑等會同夾擊但恐該匪乘隙旁竄如果勢將入蜀卽著該撫於劉長佑等各員內酌量選派一二員帶兵嚴行堵截毋令竄入川疆方爲上策設或該逆竄入有鳳所派阜陞等亦卽出境迎頭堵剿不難聚而殲旃

十八日丙戌曾國藩奏言臣自景鎮克復後檄調

道員張運蘭一軍回援寶慶臣擬率各營先赴

湖北宜昌等郡扼防茲據張運蘭稟報已於六

月二十八日自景德鎮拔營由南昌臨江袁州

一路回湘臣亦擬於初七日自撫州拔營由江

西省城至湖口泝江而上前派會攻景德鎮之

湘前強中護軍振字岳字五營已飭由饒州至

湖口過江先赴小池口一帶等候其吉字中營
現來撫州因令其由湘潭雇船至荊州取齊奏
入報

二十一日己丑駱秉章奏言石逆大股自祁陽敗

竄寶慶府南路會集賴蘋新等各逆首併力攻
撲寶慶臣調水陸各軍杜其紛竄飭各將領由

西路東路東北路且堵且剿五月初三日逆賊
數萬由長沖口高橋一帶分十餘路來撲趙煥
聯周寬世各以五成隊出擊亦分十餘路應之
鏖戰逾時洪定陞派所部長勝軍分路策應賊
不敢偏洪定陞率親軍七十人挺矛縱馬直陷
賊陣忽山凹伏賊突出洪定陞中礮殞命趙煥
聯等憑壘排開槍礮斃賊三百餘名賊始卻退

初六日賊數萬由西南兩路直撲城壘都司滕國獻等擊敗之乘勢破其三壘田興恕見賊援厚集急派全祖凱等率虎威軍兩營截之復派遊擊劉義方等繼進各營共斃賊七八百名方官軍與賊接仗時另股賊在陣後各嶺築壘十餘處近偏田興恕營盤相距僅三四里是時石逆踞城南十里之澄水橋賴逆踞城西五里之

神灘渡傳逆踞城東十二里之泥灣賊衆號稱
數十萬環城三面徧紮賊壘惟北路及東北路
賊蹤尙稀官軍文報餉需每取道於此臣慮其
長圍速合令候補按察使劉長佑等各率所部
分路進剿剋期大舉十七日賊七八萬從馬鞍
山余湖山至東路五里牌壓壘而陳周寬世趙
煥聯各出六成隊分路擊之田興恕見東路賊

勢甚厚立派四營前往助戰賊布陣縱橫各十數里各路官軍奮力衝殺鏖戰三時斃賊千餘賊始敗退然自是東北路亦皆徧紮賊壘長圍已合文報餉道均梗二十五六等日劉嶽昭等各帶所部兵勇至寶郡東四十里之洪橋副將何紹彩遊擊黃三清亦至劉長佑江忠義劉坤一方由武岡拔營來援師次黃橋石逆偵知遣

逆首陳亨容蕭受璜等率賊黨一萬數千復竄
新甯蓋知劉長佑一軍將士皆新甯人欲以此
爲牽綴也劉長佑以大義諭所部率之援寶令
劉坤一率勇二千回援新甯且斷其竄武岡之
路六月初二日劉嶽昭等九營由洪橋進郡東
北二十里之柳家橋何紹彩黃三清兩營勇丁
二千一百名仍駐洪橋賊見洪橋軍單遽起乘

之是日午後賊二萬餘分十餘路撲洪橋營盤
何紹彩黃三清率全隊禦之鏖戰兩時已將賊
擊退忽賊數千自後路山梁壓下守營長夫驚
潰營壘遂陷何紹彩黃三清督勇血戰突圍而
出劉長佑方繞道新化南境之麻溪渡資江而
來聞洪橋有失恐柳橋軍心不固遂兼程疾進
初五日所部齊抵郡北三十里之嚴塘次日起

柳橋營次會商改由東北一路進剿是時督臣
遣李續宜所部湘勇十一營亦陸續渡湖而南
將於益陽取齊援寶臣與李續宜商定由益陽
取道安化之藍田直指寶郡北路以進並以前
調來湘之馬隊官兵一百九十四員名隸之凡
寶城內外各營兵勇三萬有奇均飭歸李續宜
節制調遣初十日賊二三萬冒雨撲柳橋營壘

劉嶽昭等各營擊卻之斃賊千餘名劉長佑師
進高沖石逆見援軍日進抽撥悍賊築壘東北
路石山亭一帶阻之賴逆派悍賊數千由神灘
渡竄西北紛擾新化南境之草嶺鋪牛山擬復
踞援軍之後李續宜全軍於十九日行抵藍田
距新化縣城一百一十里距寶慶府城一百四
十里其勢又出草嶺鋪牛山之後奸謀遂沮二

十日柳橋各軍復進紮半邊街二十五日李續
宜師進水竹地方單騎赴高家沖大營晤劉長
佑會商破賊之策是夜五鼓賊數萬分伏半邊
街近處山嶺二十六日石逆親督大股分由藍
江鋪短陂橋清水塘長茅沖蠡擁而來各營出
六成隊迎擊奮威衝殺賊始敗潰忽另股賊從
各路衝出各營刀矛格擊復斃悍賊數百名又

有另股賊隊來撲高冲營盤劉長佑督率道員
江忠義等分路擊之千總劉九盛把總蔣得祿
陣亡唐顯烈受矛傷十一處猶裹創力戰斃賊
約二三百名二十八日李續宜率全軍渡資而
西時東北路大股逆賊均尙未覺辰刻各逆首
方率賊六七萬徑撲半邊街大營自雀塘列隊
至清水塘環繞二十餘里劉嶽昭等分路截擊

自辰至申斃賊二千餘名李續宜一面督率兵
勇將田家渡賊壘賊卡一律平毀敗賊爭由浮
橋渡資官軍蹙之浮橋中斷溺賊無數是戰共
破賊壘七座賊卡三十六處斃賊二千一百餘
人生擒二百六十餘人救出難民七八百名而
城中文報餉道通矣二十九日賊復大至重重
圍裏大股悍賊忽前忽後希圖繞出後路以襲

官軍營壘也李續宜不爲之動督飭馬步隊官兵嚴陣以待日午各賊齊偪營壘李續宜號旗一舉正伏齊出前後衝殺賊匪紛潰官軍四面進偪賊屍遍野餘賊渡資東竄水陸各軍追擊皆有斬擒是日李續宜一軍共踏賊營六十五座賊卡一百三十餘處殺賊八千餘人溺斃者約四五千人生擒賊一千七百餘人內有僞軍

略戴振聲等賊目四十八名訊明正法救出被
擄難民五六千人次日將資西一帶餘匪搜捕
淨盡現在寶郡北路西路已就肅清大股逆賊
均屯聚東南兩路臣已飭李續宜嚴防東路矣
此次石逆攻圍寶郡糾合數省劇寇挾全力而
來勢甚猖獗儲寶郡稍有疏失不獨湘省糜爛
卽鄂蜀斷難遏此兇鋒督臣洞悉賊情先後調

派官軍回湘防剿並協濟軍餉俾機勢得以速
振裨益大局實非淺鮮按察使銜湖北荆宜施
道李續宜居心忠實識略素優此次赴援寶郡
機宜敏速立解重圍勞績卓著可否仰懇

天恩賞加布政使銜以示獎勵所部將士同心戮力克
奏奇功可否由臣保奏其守城文武官紳及援
寶各軍之實在出力者可否彙案請獎之處伏

候

聖裁力戰陣亡之都司銜儘先守備洪定陞等相應開
列奏請

賜卹以慰忠魂奏入

上諭內閣曰石逆大股攻撲寶慶經水陸各軍援剿屢
獲勝仗城圍立解北路西路已就肅清剿辦甚爲得
手湖北荆宜施道李續宜赴援神速懋著勞績著加

恩賞加布政使銜以示優獎其餘守城文武官紳及
赴援各軍將士之尤爲出力者著駱秉章彙案保奏
力戰陣亡之都司銜儘先守備洪定陞著照都司例
議卹擬保遊擊守備田興讓著照遊擊例議卹千總
劉九盛著照千總例議卹把總伍雲高毛季發著從
優照千總例議卹蔣得祿著照把總例議卹外委王
恆茂著從優照把總例議卹

二十四日壬辰張芾奏言祁門敗匪竄踞石埭之

七都署皖南鎮總兵江長貴聞警後卽調副將
王恩榮馳赴夏邨以遏內竄並調都司魯璵扼
焚郭邨以顧太平黟縣門戶時總兵米興朝適
督隊行抵石埭當令遊擊田宗興等率部會擊
七月初一日賊由夏邨對河分股進撲我軍營
盤王恩榮揮令各軍分路抵擊斬馘頗多賊仍

向七都敗走初四日米興朝督隊進擊七都踞
賊獲勝賊忽由閒道分竄宏潭美坑致太平黟
縣同時喫重幸江長貴已先期馳至黟城分扼
嶺隘又以郭邨兵力過單派參將羅承勳等馳
往合隊並調王恩榮回顧郭邨賊知羅承勳一
軍甫抵郭邨立營未定卽分股來犯經羅承勳
魯璵等擊走立將營盤築成臣以郭邨祇此數

軍該逆設再窺犯則郭邨有失東南兩路皆達徽州腹地此時勁旅分布在外無可撥援因與江長貴函商擬調建德防軍進嶺或可稍資堵剿詎賊衆已於初七日糾全股直犯郭邨王恩榮等各率所部迎戰甫經接仗千總夏洪才棄營先逃該逆乘勢撲營分股從後包抄羅承勳魯璵急收隊進營王恩榮身受矛傷裹創血戰

而賊已將羅承勳各營圍繞數重驟難攻入初
八日賊於官軍營後築卡七處王恩榮羅仲山
復奮力衝擊毀賊二卡該逆負固死拒仍不得
破圍而入江長貴在黟縣聞報令知府蘇式敬
等由羊棧嶺出援直擣中堅突聞營中槍礮聲
發千總穆大高等率兵勇潰圍而出羅承勳魯
璵等尙無下落現在江長貴收集隊伍銳氣一

時難復王恩榮所帶僅二百餘人退守焦邨以
蘇式敬羅仲山守湯嶺以知縣吳欽曾守窮嶺
部下均甚單薄幸撲犯黟縣章嶺之賊經江長
貴督飭都司趙廷貴當時擊退軍心稍壯特建
德防軍未能卽日入嶺尙屬不敷分撥周大受
續派副將榮陞等三隊據報已抵甘棠卽催令
趕紮焦邨與王恩榮合隊進攻江長貴親駐黟

縣督防各嶺調度布置悉臻周密剋日會師夾擊

張芾又奏言建德之賊自吳公嶺受創後閉卡死守官軍文報仍不能通經副將楊名聲等督率馬步各軍乘勝疊衝槍斃狡悍賊目多名賊衆紛亂楊名聲揮軍直入將三官廟三里亭及葛公鎮賊營五處賊卡五座一律踏平陣斬七

十餘級殲斃無算維時副將王夢麟亦率同遊擊袁國祥等出隊夾擊斬馘甚多並傷僞老國宗楊逆左股餘賊悉遁建城堯渡一帶查建德接壤江西總兵普承堯及景德鎮各軍尙無出境會剿之期現在該逆雖經受創而伏巢不出一時尙難攻拔城池當此徽郡空虛情形緊迫不能不作移緩就急之計以先顧內防茲已飭

王夢麟楊名聲等督同將弁進嶺聽調仍留馬
懷珍等數隊扼守祁門嶺隘以備建德踞匪蠢
動一俟宏潭郭邨賊退防務稍鬆或江西官軍
約期進剿卽當飭令該將備等出嶺會攻奏入

上命軍機大臣傳諭張芾耆齡曰宏潭郭邨地方爲太
平黟縣門戶賊匪分股竄擾徽防喫緊雖有江長貴
等分扼嶺隘恐賊衆兵單不敷防剿建德與江西接

壞現在景德鎮業經收復普承堯一軍株守九江置
重兵於無用之地著耆齡嚴飭該總兵剋日帶兵出
境會合建德各軍實力兜剿以遏賊氛張芾已飭王
夢麟楊名聲等進嶺聽調著妥籌布置嚴密防範勿
令匪蹤闖入爲要其參將馬懷珍等各隊卽令留守
祁門嶺隘以備建德踞匪蠢動俟徽郡防務稍鬆再
飭該將備等出嶺會剿

二十八日

丙申

勝保奏言據和春函稱遵

旨調度蔣壩及天長防剿機宜並應由揚城添撥官兵

速取天長等因伏思從前江北一軍原爲扼賊
北竄昨據張玉良來稟攻剿六合及留防揚州
邵伯之兵共一萬八千餘名此時江北兵力尙
厚和春以江北之兵顧東北之防正合舊轍臣
亦可專心西剿藉免東顧之虞且天長城內之

賊經臣派軍密決石梁之河浸灌城中已將西北城牆衝塌十餘丈該逆現已大半出城散處東南各鄉與六賊聯成一片若揚防之軍乘虛疾擣賊巢較易得手

同日和春奏言蔣壩距金陵甚遠長江之外尙隔高寶一湖軍情難以遙制袁甲三於七月初一日由淮上至寶應渡河而西親赴蔣壩一帶

查勘形勢並知該漕臣接奉

諭旨令就近籌辦蔣壩防堵事宜仰見

皇上因地擇人權衡至當竊思袁甲三熟悉皖北形勢

此次親歷其地全局在胸且蔣壩係清淮門戶

漕臣駐紮本近卽以該處防務責令調度最爲

合宜惟所部並無得力兵勇亦難措手擬以安

勇一軍及勝保留防蔣壩盱眙之兵歸其節制

臣得以全力專顧大江南北於防務較有裨益
至揚州存兵僅五千有奇該處距天長一百餘
里此時力圖規復孤軍深入至少亦須六七千
人方有把握即使揚州之兵盡隊移攻亦尙不
敷調遣且裏下河產米之鄉久爲該逆垂涎萬
一由閒道乘虛而至勢必震驚東路是以未敢
輕議進兵六合存營兵勇現祇一萬有奇亦屬

無可再分臣等會商擬俟新兵募到截斷浦口
則江浦與六合相通我軍乘勢先取六合已曠
天長之後賊亦不攻自走矣均奏入

上命軍機大臣傳諭和春袁甲三曰蔣壩爲清淮門戶
地方緊要前已諭令袁甲三督率籌辦所有和春派
撥安勇一軍及勝保留防蔣壩盱眙之兵均著歸袁
甲三節制該署漕督卽妥爲布置相機堵剿和春雖

駐紮金陵而江北各軍勦辦機宜亦當統籌兼顧據
勝保奏攻勦六合及留防揚州邵伯之兵共一萬八
千餘名兵力不爲不厚天長之賊經勝保決河灌城
已衝塌十餘丈該逆現已出城散處著和春仍飭駐
揚官軍先攻天長毋得遙待浦六相通藉詞延緩

和春又奏言據總兵張玉良稟報七月初五日
六合城北竹鎮地方有賊二三千人來撲西南

各營該總兵分軍爲三馬隊隨後馳往截擊賊
亦分三股抗拒甫經接仗忽南門出賊二千人
策應副將王萬清等率中路兵勇槍礮齊施先
將賊援衝爲數段立斃騎馬悍賊數名逆黨死
戰且卻且前遊擊蔣臨照等以馬隊蹴之賊自
相踐踏殲斃無數南門之賊遙擁來救我步隊
三路俱進城逆踉蹌回奔竹鎮之賊亦紛紛鼠

竄十七日浦口西門忽出賊千餘人攻撲參將
陳立昌各營東門亦出賊一二千人沿山窺我
營盤提督周天培指揮諸軍以大礮轟擊斃賊
甚多餘匪擁擠入城死傷過半至江上逆援出
沒無定疊據總兵吳全美由魯港稟報蕪湖逆
援麇集石碇峨橋水陸皆賊南則三山北則雙
港馬步橋喫緊萬分六月十四日逆賊率馬步

數百人徑犯峨橋及馬步橋該總兵分撥兵勇
水陸迎截忽小河南賊划六七十隻飛棹而來
槍礮疊發我大船無風不能起碇以三板迎擊
外委何朝勳手發大礮立沈賊划二隻餘賊驚
潰岸賊相隨四散何朝勳中礮陣亡旋探得北
鄉之賊盡趨南鄉蕪湖蠓磯諸賊搬運大礮欲
於新溝趕築礮臺該總兵於十九二十等日密

令李起高等督帶船勇駛至對江更番開礮將賊卡礮臺焚燬復據遊擊賴鎮海稟稱七月初一日二更時有賊船十餘隻由烏江西來該遊擊撥快船迎勦施放槍礮立沈賊船數隻餘船猶拌死下竄我軍四面兜圍攏近賊船刀矛並刺該逆紛紛墮水獲船六隻起獲米糧一百餘石初二初三至初九初十等日官軍疊有斬擒

擊沈賊船多隻起獲糧米二百五十餘石西江
陳世忠浦口陳國泰各水師連日擊賊殲斃不
少查江北皖南正在收穫該逆擄糧近則從陸
路運至浦口遠則從上游蕪湖等處裝船乘夜
運入金陵遊擊賴鎮海疊次截獲盜糧數百石
最爲得力吳全美扼守魯港殲賊尤多惟所統
祇紅單十船陸勇亦不過數百名兵力實形單

薄該總兵請由甯防撥兵添紮鴉山以扼蕪湖
池州上下要衝無如浮景潰匪新由石埭七都
竄入郭邨徽防告急周天受旣由涇縣策應徽
防卽不能分兵鴉山江浦各營積水未消臣因
布置增兵暫留張國樑許乃釗會酌機宜惟有
一面亟攻浦六一面斷絕江上賊援俟兵力稍
厚卽當會擣金陵奏入報

聞

同日

上諭內閣曰福建陸路提督李若珠著幫辦和春軍務